



Zo pau tawh biakpiak khop dingni--
(November 29, 2009-- 8:30 pm-10:30 pm)

Zomite khat leh khat ong ki-zom sak ding

LAIZOMTE GROUP

<http://groups.yahoo.com/group/laizomte/>

**USA Thupiak a beisa khempeuh na sim kik
nop leh a nuai a link pan ki-en thei**

<http://zomilibrary.com/main/items/show/362>

**Zomi tawh kisai lai manpha tuamtuum na sim
nop leh a nuai a Zomi Online Library link
pan ki-lut thei**

www.zomilibrary.com

USA Thupiak aa ding huhna a
pia nuamte in " Myanmar Mis-
sion Church" min tawh
check/MO kipuak thei hi

Mailing Address:-

PO Box 6676

Lake Worth FL 33466

Email:- usathupiak@yahoo.com

Copyright reserved

Pasian in Kha ahi hi. Amah abiate in lungsim leh thumaan
thutak tawh abia ding uh hi. (John 4:24)

Myanmar Mission Church (Florida, USA)

Pastor Rev. Kham Do Thang(Sia Thangno)

Home phone (561)-642-4088

Cell phone (561)-707-8729

Kawl pau tawh Pasian biakna:-

Sunday-(8:30pm pan 10:30pm)

Zo pau tawh Pasian biakna:-

Sunday- The last week of the month

(8:30pm pan 10:30pm)

Neek-khawm(Communion Service)

Sunday- The first week of the month

Amun:-

1019 N.24th Ave, Hollywood, FL 33020



October 11, Pawlpi kum 6 cinna pawl ah Letsong piakna

Editor:- Pa Neng Khan Pau (Nepau)

786-543-1790(Nepaulehsaw@gmail.com)

Joint Editor:- Pa Vungh Pian Sing(Singpi)

Circulation Manager:- Pa Kham Kap Hang(Hangbawi)

Photographer:- Pa Dal Za Lian(Ko Pauk)

Advisers:-

Tg Pau Cin Thang(Thangbawi)

Tg Tawng Cin Khai(Tawngkhai)

MMC Gammial na sem Sia Lun Za Thang' teci panna



Siapate innkuan

gamlak ah gua sat ding a ka pai uh hi. Ka guasatna ah gul khat in hong tuu hi. Gul in hong tut khit a sawt lo in na sa lua in, ka mit in khua mu nawn lo, ka gawl khawng gol gawp in, ka naak zo nawn kei hi. Atawpna ah ka cihna ding ka theih loh teh, thungen kha ing. "Topa aw, hih ka nakna pan damna nong piak leh, nang a ding in teci ka pang ding hi," ci-in thu ka ngen hi. Topa'n ka lungsim tawng tawh thu ka nget hong za in, damna hong pia hi. (Haleluijah).

Topa'n damna hong piakni a kipan teci ka pang hi. Pasion a nungta tak tak hi, ci-in ka um thei pan hi. Ka pianthak ma a, ka nuntakna ah a piang thu thumte in,

1. Lungnopna, daihna leh damna omlo
2. Ka it mahmah ka tapa in hong nusia,
3. Gulpi in hong tuu,

Topa a phawklo ka nuntakna pan hih a tung a thumte hang in nuntakna man ah hong khak pa in, Zeisu ahi hi.

Ka pianna

Kei ka min pen Lun Za Thang hi. Homalin gamuk sung Pyang Kon khua ah ka suak hi. Lawi lo kho mi ka hi hi. Ka neu lai a ki pan Christian ka hih hang in, Pasion' upna tak nei thei nai lo ka hihman in, ka duhduh ne/ dawn in, ka ut bang in a tawpna ah Pasion phawk lo leh Pasion na ngawng thei nawn lo zah dong ka tung hi. Ka lungsim sung ah, ka sep zawh man bek in an a kine zo bek hi cih bek ka ngaihsun hi. Ka nu in Pasion' thu hong hilh den hi. Ka nu' gen pen sang zo lo in, "Nu aw, Pasion om takpi a hih leh hi bangin haksa takpi in om kei ni," ka ci hi.

Hih ni a kipan Pasion' aa ding in ki-ap in, Pasion' na ka seem hi. Pasion' hehpihna bek tawh ka nungta a, kei aa ding in Pasion' nasepna in a manpha mahmah nasep hi, ci-in Pasion' min ka phat hi. Lungdam.

Innkuan vai

Ka innkuan in mi 6(Guk) ka pha uh hi. Ko unau 4(li) ka pha uh hi. Ka pa kumpi nasem ahih mah bangin Khanti leh Honmalin khuapi ah ka om uh hi. Honmalin ah ka om sung un hamsiatna tawh ka pa uh hong damlo in, a sawtlo in hong nusia hi. Ka pa hong nusiak khit teh ka nu bek in hong vaak ahihmanin, haksatna tampi ka tuak uh hi. Ka nuntakna uh hong haksa semsem ahih manin ka neih uh inn leh lo teng zuak in, nuntakna nuam zaw deuh ding in ka khua ah ka ciah kik uh hi. Haksatna tampite hangin, sang zong ka kah zo nawn kei hi. Pasion' nasem tampi tak in zong gupkhatna thu hong gen uh hi. A hih hang Zeisu honpa leh gumpa in ka sang zo kei hi.

Pasion' sapna

Zi ka neih khit a kipan ka innkuan sung ah haksatna tampi hong kibehlap hi. Lungnopna peuhmah om lo hi. Ta pasal khat ka nei uh a, kum thum hong phak teh hong nusia hi. Ka it ka tapa hong sih sawnsawn teh na salua in, Pasion tawh kigamla semsem in, ka nungta toto uh hi. Nikhat, ka sungh pa tawh

Column 10 pan a zom

USA Thupuak leh Zomi Innkuan
kum 3 kizom President a seem masa pen
Pu Thang Do Hang tawh ki-holimna

Mai kum ah bawl ding hi ta ci leng, tu laitak geel nai ke le hang, ziakaai in na um hia?

Ih pai zia ka et ciang, geel khol keei a, ih bawl leh, tu leh tu a ih bawl tawm pen a hoihna kibang lel in um ing. Hih kholh luat ding tam sa khol kei mai ing.

Tu laitak Zomi Innkuan makaite na bangci muh a leh?

Makai thakte pen a kisin tung suah uh ahih man un, sep dan luite behlap in kalsuan leh hoih sa ing. Sep dan a thak tam lua leh, amau aa ding haksatna tampi om ding in mu ing.

USA Thupuak tawh nasepnate nang lam pan bangci muh na hia? Man nei na sa hia?

Kei' muhna ah, Zomite tawh kisai lai tawh nasepna tawm mahmah lai ahih manin ah a sep huai khat hi.

Hih kei le hang zong thu kizaakna ding tampi a om hang in ah, lai in a kihawm tak ciang, tua in man nei. Sep zawh nak leh a kiseem khia teng pen val lo ban ah, a kisas den hi zaw in mu ing.

A tawpna ah, gen nop, behlap nop na nei hia?

Kipawlna ah makai ih sep ciang, Zomite'n Pasion' thu i paampaih loh ding; Pasion' thu tawh kalsuan kawm in i minam aa ding kitatsat lo in sep khat ding; Moses, Elijah-te bangin Pasion' aa ding leh minam aa ding seem ding; Pasion' thu nak lak lua in, beh leh phung paai lo ding cih gen nuam ing. Lungdam!

Hunzui Thupi

3
Column

4
Column

(1) Zo pau tawh Pasion biakna Myanmar Mission Church in khasim nipi nunung pen ta kinei a, November kha 29 nitaakin kinei leuleu ding a, hih ni pen pawlpi 'Mission Birth day' ni tawh ki thuah khawm pah ding hi. Hih Zo hun ki khop leh Mission birth day lawpni in Zomi a kua mapeuhin tha nong piak tek na'ng un, itna lianpi tawh kong sam uh hi.. Naupangte zong, Zo pau leh Zo la tawh pantahna om hi.

(2) Kha ii kal masa Saturday ni 9:30 AM-3:00PM hun sim biakinn ah thungetna kinei den a, tu kha November 7 ni in nuam tak in kinei thei hi. Mai December ni 5 ni in zong antan thungetna biakinn mah ah kinei ding hi. A lunglut khempeuh nong pai na ding un kong zawn uh hi.

(3) Pasion' hehpihna tawh ei pau (Zo lai) tawh USA Thupuak ci- in laihawm ih hawm khat zawn mah bangin, Pasion' thu Kawl lai tawh zong laihawm (way-saa,Tracts) kipan khia in, ei' lai thei lo mite kiang ah hawm zawnah ding tupna kinei hi.

(4) Maikha December 12 ni(Saturday) ni-nitak in Tulsa pan Rev.Dr. Kham Khan Khai(Sia Khaipi) makaihna tawh ZOLUS Concert nop citak in Hollywood, Florida ah ki nei ding hi. Hih hun ah Zo la ngaih nonote sakna ki nei ding hi. La sak ding a lunggulh akua matek in Pa Thang Suan Mang kiang ah thu na za sak un.

(5) Zomi Asociation of USA (ZAUS) consultation leh Zomi Innkuan Portland Khuado October 10, 2009 ni in nuam tak in kibawl hi. Khuado an nek khop na ding in bawngtal khat ki go hi. Zin mang teng: Prof: Dr. C Thang Za Tuan, Rev. Dr. J.M. Ngul Khan Pau, Rev. Dr. Kham Khan Khai, Pu G. Thang Khan Mung , Pu Thang Suan Khup leh Pu Zam King Mang hi.

(6) Florida Zomi Innkuan makaihna tawh Khuado paw, kum khen paw October 30 nitaak in nuam tak kibawl thei hi. Tua hun sung ah, nidangin a om ngei nai lo, Tennis kimawlna pan a khatna leh a nihna ngahte pahtawina piakna zong om hi. Mi sawm a kidemna pan in, a khatna Tg Tawng-khai in ngah a, a nihna pen Tg Suanno in ngah hi. Lai lam leh neek zawnah ding tawh kisai certificate ngahte pahtawina hun zong kinei hi. FZI president Pa Pum Za Khai leh Dr. Vei Kho Ning in hanthotna nei uh a, Pa Neng Pau in hun uk seem hi. A pai khempeuh in Zo ngeina an ne uh hi.

(7) Huihualpi Hurricane Ida in, Florida gamgii nitumna lam ah November 10 ni zingsang lam in nawk kha a, a tha neem luata ahah manin, huihpi, tropical storm suak hi. Tua kiim ah Dr. Kaptawngte innkuan leh Zomi pawlkhat om a, bangmah lau huaina tuak kha lo cih thu kiza hi.

Tulai Vanman	2007 Aug. vanman		2009 vanman	
Van min	Pound (1)hi leh	Tawi(1) hi leh	Pound (1)hi leh	Tawi(1) hi leh
Catfish Nugget	\$ 2.39	\$ 8.37	\$ 3.49	\$ 12.22
Seabass	\$ 19.99	\$ 69.97	\$ 21.99	\$ 76.97
Bawng(tenderloin)	\$ 19.09	\$ 66.82	\$ 16.99	\$ 59.47
Bawng(neckbone)	\$ 1.69	\$ 5.92	\$ 1.69	\$ 5.92
Voksa(loin)	\$ 5.99	\$ 20.97	\$ 2.99	\$ 10.47
Voksa(ground)	\$ 2.29	\$ 8.02	\$ 1.29	\$ 4.52
Yellow Onion	\$ 2.99	\$ 10.47	\$ 0.99	\$ 3.47
White potatoes	\$ 3.59	\$ 12.57	\$ 3.59	\$ 12.57
Vine Tomatoes	\$ 1.49	\$ 5.22	\$ 2.59	\$ 9.07

Tawi tawh kilei lo-in, pound tawh kilei bek hi.

USA Thupuak kipat hun lai vanman leh tu hun kilamdannalahna hi.

A nuai a, USA Thupuak aa ding huhna ong pia khatciat tung ah lungdamna ih ciamteh hi.

(1) Pu Zam King Mang(OR)-- \$ 50

(2) Pa Pau Sian Lian(FL)-- \$ 750 val man Dell Laser Printer



Printer a thak ong lei sak Pa Pau Sian Lian'tung ah, lungdamna lahna laidal piakna

Thungetna ah phawk ni

1. MMC pawlpi in Topa biakpiakna ding mun kip khat neih zawnah ding leh pawlpi vanzat-te a kim in, neih zawnah ding.
2. MMC pawlpi in Naupang sang khat neih zawnah ding leh ahilh ding sia khat zong neih zawnah ding.
3. Kawl gam ah mission nasem Sia Lun Za Thangte innkuan Topa'n lawhcinna tampi ong muh sakna ding
4. MMC pawlpi sung ah Topa'n kha lam leh taksa lam cidamna thupha tampi hong piak mah bang in, mai lam ah a tam zaw hong behlap laina ding.
5. Sia Mengpu' tupa(Tg Gabriel) a dam siangna ding.
6. Kawl gam leh USA a uk kumpite' aa ding.
7. Thai gamgii ah sin natna thuk Pa Ral lian Hmung in cidamna a ngah kikna ding.

3
Column

4
Column

Thupatna

Mihingte in huang kinei ciat hi. Pawlkhatte kimu thei a, pawlkhatte kimu thei lo hi. Pawlkhatte daai-uumna kilang mahmah a, pawlkhatte leuleu huang-uumna kilangh lua lo hi. A kilangh a, a kilangh takei zongin, huang pen om gige hi, cih kimu thei in zong kithei thei hi. Mihing leh ganhingte in huang kinei ciat a, huang uumna pen dai kici in huang kepna dingin dai ki-uum pah hi. Dai aki-uum lote zong a ki ciangtan' ciaptehna huang khat mah na nei veve hamtang uh hi.

Ganhing tawh kisai gen masa le hang, ganhing a khawi ngeite in tel mahmah ding hi hang. Gan kikhah khong theihna mun leh kikhah khong theih lohna mun kiciangtan hi. A kikhah khong theihna mun pen taang gam hi a, a kikhah khong theih lohna mun pen aituam gam leh lo-te na hi hi. I bawng i sial khat in mi' huan mi' lo ah va taa in an a va neek sak ciangin *lengla khah* hong pai pah hi. Hih thutawh kisai a va thuum dingin a kipai pen *gan kamtua- thuum* kici hi. Banghang in gan kamtuam va thuum kul hiam? I cih tak ciangin, mi' huang sung ah (ei huangsung a hi lo) i gan pen huang neite' phalna om lo pi in, va luut ahih man na hi hi. A thu duh ngiatte bang in lo sung a ante a kine takei phial zongin a gan in a huang uh kaan ahih manin gan neite *gaamh* veve uh hi. Gan neite aa dingin thumaan lo tawh a kibat hangin lo neite aa dingin thumaan mah na hi zel hi. Ahih hangin *liau leh liau loh* ding pen lo nei-huang neite' thu siam dan leh gan neite' thuum siamna tawh kizui hi zaw thei hi.

Thu-Huang

Gennopna bulpi in ah, ganhing ahi zongin, mihing ahi zongin, ei' neihsa ahi lo midang' huang sung ih va kaan ciangin kaan man piak kul liau kul, na hi hi. Nungakte bang gen pak leng, a nau zaw khatin a u zaw numei khat pasal neih san ding ahih leh, kaan'man a piak kul hi. Bang hang hiam cih leh, a u nu mun aman kaan ahih man in huang kaan mah hong suak veve hi. Hih lai ah, hun leh huang hong kithuap hi. A hun leh a huang hong kan ahih manin kaan man hong piak kul hi.

Huang tuamtuam kikap ding tam mahmah ahih manin tutung in *Thu-Huang* tawh kisai in pan ding hi hang. Thu ih cih pen a thupi lua mahmah leh thu a nei mahmah na khat hi. Thu om kei leh na kitem theilo hi. Na khat peuhpeuh a pian' khiatna dingin thu a om photphot kul hi. Thu pen thupi mahmah a, zangh siam le'ng hoih mahmah in phat tuamna tampi piang sak thei hi. Zangh siam kei le'ng lah, lau huai mahmah leh guu pha mahmah thei hi. Thu pen lungsim ngaihsut na pan hong kipan in, lungsim ngaitutna panin kam pau leh lai tawh ahi zongin tua thu pen kisuah khia hi. Tu hun leitung pilna kikhango mahmah ta ahih manin thu pen nam tuamtuam in kikhah khia, kizeel khia thei a, mun tuamtuam ah hun tomno cik sungin kizeel khia thei ziauziau ta hi. Khanglui ten, "Thu hoih in baangkua kan lo, thu sia in mual kua khum" na ci uh hi. Thu hoih khat om leh kizeel khia ziauziau theita in, thu sia khat om leh lah kiza baih zaw kankan lai mawk hi. Tua ahih man in thuhoih ih gente sangin thusia ih gen khiat khaak ding kidop huai mahmah zaw kan lai hi.

Zomite pen leitung mong dong mite omnate ah kizeel khinta ihih hangin, thu kizaakna pen ih neulai (khangluilai) sangin baih zaw lai hi. Thu sia thu pha ih gen khat pen minute khat sungin leitung mong dong a-om Zomi



07/18/2008
Sia Zam Khai

khatin

internet-email pan in na sim thei ziau in, phone leh internet kihona (chats) tuamtuam panin zong kiza thei pah ziauziau ta hi. Zomite nidang sangin zong kikhango zaw in khua zong kimu zaw deuhta a, ih pilnate zong hong sang zaw deuh ta in, mi'gam mi'lei zong kipha zaw deuh ta hi. Hih bang a, ih khantohna tawh kizui in Zomite i gamtat, i kam pau, ih lai-atte khempeuh a khangto mipilte leh muhna sangte' gamtat kam pau kiheek ziate bangin ih om theih ih zat theih ih zuih theih ding hun zong hong tung to ta

hi, cih pen ih phawk ding thupi mahmah hi.

Huang thu tawh kisai a kikum ihihna tawh kizui in, Zomite'n ih gen thu leh late in i Zomi pih mi'huang sung khat peuh a kaan pheih kha hiam?, cih zong a kidot huai leh a ngaihsut huai mahmah thu khat hi. Kisuakta tah ci in ut peuhpeuh, ut bangbang phial-gen phial-at gawpding zong hi khin pah lo hi. A khangto a pil leh thu mu a kisa ta Zomite ihih leh, thu khat peuhpeuh ih gen ma ih at ma in ih khinkhah phot ding kizam mahmah leh thupi mahmah hi. Mi khangto, mi pilte leh mi ciimte in mi dang khat tawh kithu tuah lohna khat a neih uh leh zong, a mimal in kitang kap kitang gen sia lo in, a thu mah bulphuh in kigen ciatciat in kihocianna leh kileptuahna nei thei uh hi. Hih pen, Zomite aa ding in etteh huai mahmah thu khat hi.

Thukhupna

Zomite nidang sangin khangto zaw ta ih kisak leh zong ih ngaihsutnate zong khat leh khat hong kilam dang toto ding a hong hoih toto ding hi. A hih hangin a hoih toto a ih khantoh semsemna dingin, Zomite' i lungduai ding, ih kitel siam ding, pilvang tak-a i gamtat kam pau siam ding leh ih kitha piak siam ding pen thupi mahmah hi. Zomite in taangpi-huang leh mimal-huang a tuamtuak a, om ahih lam phawkiat ni. Zomite mi khangtote leh mi picingte ih suah nop taktak leh, **pilvang tak in gamta kam pau in, mi' thu-mi'la kisai lopi-in tok nawi sak lo-in, mi'-mun mi'tual kizam lopi in kan tan-se lo in, thu hoih tawh nungta ciat ni! Zomite pilvang takin gamtat kam pau siam ciat dingin i biak Pasion in thupha hong pia ta hen! A hoih bek khat maw, Zomi!**

(Footnotes)

¹**Ahoih Bekhat Maw, Zomi!** cih Thulu tawh laiat a kipan khin om a, "Mi Ngeina

Zuisiam in Zo Ngeina Kemsiam Ni!"pen a serial no. 1 na hi. Asawtlo in Siamsin Magazine (Kaley College) pan in hong kisuaksak ding hi.



Na min, na nu leh pa, u nau bang zah cih leh na khua uh koi lai cihte nong gen thei dia?

Ka min pen Thang Do Hang (Hangpi) hi. Ka Pa Kham Cin Kap (99 in ong nusia) ka nu pen Nu Ngai Hau Cing, unau vekpi 10 pha, a u pen numei leh a tum pen pasal in ong sih san in, numei 6 leh pasal 2 nungta lai in, kei pen pasal lam pan a nihna, ka khua uh pen Tungzang hi in Tedim pan tai 18(18 miles) pha.

Pilna laitan bang zah ciang zo khin na hia?

Mandalay University ah B.A(Hons.)M.A(English) na zo thei ing.

Florida Zomi Innkuan kipawl na leh nang bangci bangin kizom kha thei na hiam?

America ka tun zawh ciang eimi minam vei pawlkhat kikhai khawm in Florida Miami Beach a, Sia Thawng Lian Khup-te' inn ah 2000 Easter Sunday ni(April 23) in na kiphuan khia. Kei pen tua laitak, Florida lam pan Virginia ah ka pai laitak. 2000 Thanksgiving tak ciang Miami Lakes ah Pa Sian Ngen Kamte' inn ah, kitel kikna nei uh in thukhun pawlkhat zong bawl uh. Tua zawh a sawt lo in Virginia pan Florida lam ah pai kik in, hih kipawl na ah na lut ing.

Makai dinmun bang teng, bang kumte in na seem kha hiam?

Kei pen 2001 June kha pawlin sushi sai thak khat ngah in, North Miami veeng hause in ong kikoih ciang, damdam in a kihel to suak ing. 2001 Thanksgiving ni in Kendall-a Pa Tuang Khan Nangte' inn ah inn honpawi leh Khuado pawl ah kiteelna a kineih ciang, kei pen Secretary dingin ong kiteel. 2002 Thanksgiving ciang kiteelna ah Secretary dingin ong kiteel leuleu, 2003 kiteelna ah zong Secretary mah in ong kiteel leuleu a, thumvei a seem kha suak ing. Thukhunna ah, makai khat peuh in a kizom in kum 3 sung a sep leh kum khat tawlna phawt ding cih om ahih manin, kei zong kum khat khawl phawt ing. 2005, 2006, 2007 kiteelnate ah a kizom in President in ong kiteel suak.

Kipawl na thukhunte ah, President khat pen kum 3 kizom in a sep leh makai ah kiteel kik thei nawn lo ding, tawlna suak ding cih khat om ven, a hi lai mah hia?

Nung kum in puah phatna khat kinei kik in, a tawlna sa President khat pen mun khat peuh ah a sep kik nop leh mipi in teel kik thei ding cih khat kikip sak. Kei bangin, bangbang hi leh, min hoih in khawl sak suak le hang ka cih hi in, aihang a tam zaw thukimna tawh a kikhel suak ai

veh.

A zenzen in nang mipi in ong deih in ong teel kik hi leh na sep sawm na?

A beisa in a seem ding kua mah zong ki-om nai lo ahih manin kei ong ki-teel hi dingin um zaw ing. Tu hun ciang, kei lian sangin, pilna/siamna leh experience kicing zaw a, a nei zaw makai thei ding tampi ki-om ta ahih man in ah, lut kik luat dingin sawm kei zaw mai ing.

Midang tampi om lak ah, kum 3 kizom in Secretary in ong kiteel ban ah, kum 3 kizom in President in ong kiteel cih mawk pen bang hang hi in na um a? Bang siamna, bang thusim nei na hia?

Hih bangin ong kiteel tohtohna dingin, bang siamna, thusim cihte theih nei keng. Kawlgam ka college kah lai in makai ka sep in zong, mee kuang zong lui ngei lo ka'i veh. Aizong, mi' ong deihna tawh ong kiteel pen, khatna ah Pasian' ong teel hi in ngaihsun ing. Tua ciang, hih Florida bang lian ah ci leng, a seem thei ding thu thei, mi muan huai tampi om lak ah kei ong kiteelna pen, ka ngaihsut ciang, (1) Mi khempueh zahtaak ka hih man hi zaw in teh, (2) Nasep vai tek tawh kibuai ciat a, hun pia zo ki-om lo ahih manin, tua teng lak pan kei pen khangno khat, hun pia zo pen dingin ong kilamen ahih man hi in um ing, (3) Makai thei ding tampite in i mite' aa ding a hun pia thei lo ka muh ciang, ih mipi' aa ding ka deihsakna khang mahmah in, tua pen ih mite in ong muh sak ahih man hi dingin zong um ing.

Tua ahih leh, ong kiteel man in a seem na hia? Na sep nawp man in a seem hi zaw na hia?

Sepna ding a omna munte ah, i minam aa ding panmun ka neih loh hang, ong kiese lo thute ah zong seem ing. Aihang, kipawl na khat a om leh, kipawl na langpan in na sep sawm lo. Ong kiteel tak ciang lah, ong kiteel man a a seem zong hi veve.

Zomite' aa ding na sep sungin, makai khat aa ding haks na sakna a om hia?

Kei makai masa pen hi lo ka hih manin ah, haksatna tuak kha keng. Makai masate'n tampi na nawk sak khin uh a hih ciang maw. Ahi zongin, pilna siamna leh sum leh paai kicing lo khat in makai ih sep teh, kihawmthawhna tuamtuan om thei. Tua ban ah, ih kithutuah ciang nuam mahmah napi, ih kithutuah loh ciang, kithutuah lohnate bangci gawm tuah kik ding cih hun ciang haks thei mah.

Makai nasep sungin nang leh nang in hih zo na kisakna, na lungkimna, na angtangna bang khawng om a hia?

Kei' makaih hun sung pen sep khiat hun hi nai lo a, puhun ahih manin ah, hih kibawl khia in, hih kieseem khia hi, cih luat ding mu keng. US ah, Zomite' kipawl na pen a kiphut cil hun hi in, hih kipawl na pen singkung no suan bang in, a lok nuam, a siing nuam, a hoi sak nuam tampi tak om. Tua singkung a po kipna dingin, a len keei, a hong keei, a kemcip keei kihi phawt mai. Sep khiat theih a gah lian ih muh khol loh hang, mite'n Zomite' kipawl na kician khat om cih ong mu sakna uh hi pi pen in teh.

Tua ahih leh, nang mai a seemte tawh kibang lo in na sep khiat a om na?

Kipawl na US kumpi in ong theih pihna, registration ih bawl khiat theihna, tua zong lawm leh gual in ong huhna tawh hi. Tua khiat ciang, mipi' kitaangsapna zui in, pan mun tuamtuan behlapin, tua panmunte ah makaite in amau' uukna mun tek uh ah, na nakpi in ong sep uh tak

ciang,

ih kipawlna pen ong khangto sak mahmah uh. Ih sep khatnate, a gah ahieh pah loh hang, ih kihel theihnate tampi tak kimu khia. Tua ban ah, ih kumcin kiteel ni, Thanksgiving ni pen, kiteelna tawh mite kicim thei ahieh ciang, kimawlna khat phuanni, ci in a veeng zui in, bawlung kidemna a kibawl toto pen, 2006 tak teh, US leh mun tuamtuam



Pu Thang Do Hang

pan ong kihel nuamte a kihel theihna ding ci in, a khat veina Zomi World Cup cih kipan khia thei. Tua ah, State tuamtuam pan tampi ong kipai tak ciang, Zomi Innkuan kipawlna a hin'na kimu khia thei suak hi.

Kipawlna tawh kisai in na piak khatna tampi om cih pen kimu khia hi ven, a vek in bang zah bang a sum tang in na bei ding a?

Tua pen bel, na gawm kha het kei veng in, a thu in ah, kei sang a beih zaw tampi om zaw kha lai in teh. Kei' ip sung pan ka sawk, member fee te leh a kidong tuamtuamte kihel lo in pen dollar tul 5 val hi hamtang lo dia.

Nang ip sung pan na piak sak cih pen, i Zomite' lak ah piak khatna kithaneem lua ahieh man maw?

Na ih sep tak ciang, siam loh manin, kigeel khol kim thei lo ahieh ciang a, ih deihsakna tawh, piang hen cih ih lunggulhna tawh a hi thei bangin a kihanciam hi zaw. Tua teh, ei mite a tam zaw pen, midangte tawh tehna in piak khatna ah kitha neem. Biakna lam ah piak khatna ahieh leh bel kihohih lel. Minam vai ah kithaneem mahmah cih bel kum tampi ka sep sungin mu khia ing.

Florida ah pawlpi zong ong kibehlap in, mite'n zong a pawlpi ciat uah sum piakna zong kinei semsem ci le hang, Zomi Innkuan kipawlna ah sum leh paai tawh kihelna lam ah kilamdanna a om hia?

Seh suah sawm ah khat pen kilamdang kei in teh. Sum piak i thaneem deuhdeuhna a hang pen, nidang US ih tun' cil lai in, ma ban kikualna ding om nai lo ahieh ciat manin ip sung a om zahzah kipia khia ngam ciat in mu ing. Tu hun ciang, mi kim in, innkuan maban geel tek ta ihieh ciang, budget system tawh kikal suan ta ahieh manin, hih aa ding tawh a tuamtuam sum zatna ding haksa kisa tek. Tua mun ah bel, mipi mawhsak khol keng. Tua khith teh, US ah sum bawlna zong ong kiam lailai ahieh man zong hi in cia.

Nang makaih sep sung, Secretary/President sep sung pen pawlpi kibehlap hun sung tawh kituak a, tua pawlpite kibehlapna hang in, Zomi Innkuan kipawlna tha neem sak zaw na sa hia?

Pawlpi tuamtuam ong kibehlapna hang in, Zomi Innkuan' tha tampi ong dawn zaw in mu ing. FZI in a sep ding a hi, nopna dahna vaite va vaan zo kei le hang, ong kikhasia ding, kikhasia leh, kithutuah lohna kipan ding. Ahieh hang, pawlpi tuamtuam a om ciang, a mau leh a mau ong kivaan zo zaw deuh, ong ki-en zo zaw deuh uh ahieh man un, vai tampi tak ong nuam tuam. Tua pawlpi teng ong kithutuak a, i kalsuan khop ciang, tua in i Zomi Innkuan thahatna in ong piang sak zaw.

Biakna lam tawh kisai kitha hat seemseem ta suak ahieh teh, Zomi Innkuan in biakna tawh kisai tam vaihawm lo zaw in, gualnopna lam ah kithuklut zaw leh hoieh na sa hia?

Abei sa in, kei' President sep nunung pen kum in biakna lam tawh kisai makaite in biakna vai ki-niam bawl kha. Ih

thu bulphuh ah, minam min tawh Pasian bia khawm ding cih na hi ahieh man in ah, biakna lam i thaneem sak kum pen kikaam sia, ki-zaawm sa ing. A zenzen in, biakna lam khawl in, gualnopna lam ah pai le hang, i mi bup mah in ong ngen kik ding. A beisa kum in zong ong kikun kik.

Den a na gen, Zomi World Cup tawh kisai ong pian khat dan tawm nong gen thei dia?

Ni dangin ah ci leng. FZI Cup ci in, ei teng bek kimawl hi in, 2006 kum kipat cil lam in, bawlung makaite' lam pan mun tuamtuam a om Zomite zong ong kihel theihna dingun Zomi World Cup, USA ci zaw ni cih thu sunna ong om ciang hoieh hi ci pah in, tua kum a Secretary seem Pa Pau Sian Lian leh Sport Secretary Pa En Lian Pau, a mau tagel bawlung uuk tuak uh ahiehman un, a sep theih zah seem ding in thuneihna kipia pah. A kipat tung ahieh manin, bang mah kithei nai lo, sum beina tuamtuam a om leh thukikup a kineih man kei leh zong ip sung pan kisaih hi mai. Lianpau hi ta leh, kei hi ta leng- a kua mah peuh maw.

Zomi Innkuan' cih min sangin, "Zomi Council, Zomi Association, Zomi Organization..." cih dan khat tawh min kivawh zaw bang hi leh nasepna ah a taangzai zaw in na um hia?

Zomi Innkuan kipawlna a kiphut tungin, "Zomi Innkuan" ci ding cih a kikip sak ciang, tua min a zangh ih hi veh. Ih deih pen, a kipawlna hi masa zaw maw. Kei bang tua lai in om kha keng in, tua lai a, i mipite'n a teel pen uh a zangh ih hi veh. Tua bang sem ding ihieh ciang ci a, min kipia hi lo zaw. Tua kipawlna in, i mipite' aa ding ih sep theih bang sem ding cih na hi.

Kipawlna tungtawn in, hih US kumpi in ong theih pih ding leh, gamgii lam ah haksatna a tuakte huh theihna ding tawh kisai hanciamna kizam na sa hia?

Den a ih gen sa mah bangin ah, ih sep ding tampi tak a kistem zo nai lo, a phut in thapaai lai hi hang. USA Zomi Innkuan zong, 2005 in hih lai pan mah in phut ih hi veh. Tua zong, a phut in kithapaai lai. Malaysia lam, Thailam-a te pen, ei na kiging khin hi peuh le hang, a kizam khat peuh a kibawh pah lianlian man ding hi ven, kei bang maww pen sushi seem in buai tha pai, kizin khia man lo hi mai. Lungsim a ut hang lah, hun pia zo lo, hun a pia zo ding mi a om phial hang a, ma kai kha lo zong hi thei. Sep luat ding vive, a kiseum nai lo hi zaw.

US a tung khin Zomite'n Zomi min pua lo in min dang mang min khawng vawh suk ziau lel le'ng hoieh na sa lel hia?

Mun dang gam dang ah ih om ciang, i mite'n i min mah zangh ciat le'ng hoieh sa ing. Bang hang hiam cih leh, mi nam dangte'n amau' min mah na zangh lel uh ai veh.

Mai kum pen FZI ih phuah zawh a kum 10 cinna hi maww ahieh teh, nang lian bang President a seem hi le cin, pawl na bawl sawm hia?

Kum 10 cin Tin Jubilee pen bawl zo hi le hang, bawl huai sa ing. Hih bawl kei kha le hang, Silver Jubilee ngak ding, kum tampi. Zomi Innkuan tawh kisai, leitung bup lawh zo ih hieh ciang zong, bawl taak sa ing. Makai ong seem peuhpeuh in, a hih zawh zah ciang khat tawh ong bawl hamtang le uh hoieh sa ing.

COLUMN (2) AH A BAN OM HI====>

Focusing on our Spiritual Battle (Kha galdona)

Dawi mangpa nial zawh dan theih na ding leh Pasian' deihnate tel siam theih na ding in leitung cii leh sa gal ih do hi. Kha galdona ih neih teh, gal zawhna leh lelhna pen ih do na phualpi a hi, ii cii leh sa pumpi leh ih lungsim(lungtang) sung ah kithei thei hi.

A tung ah ih gen sa mah bang in, thu-um mite in nisim in, leitung cii leh sa gal dona ih nei den hi. Dawi mangpa' ngimna bulpi in, eite hong buai sak leh haksakna hong pia ding ciang bek hi lo in, ih kha leitang mahmah zong hong susia gawp ding ahi hi. Dawi mangpa in a ma' ngimnate a tangtun theihna ding in a siam tawp leh galvan a neih khempeuhte zang in hong do ding ahi hi. A tupna pi in, ih leitung pumpi bek hilo, neihsa lamsa ,lungsim ngaihsutnate leh ih kha mahmah sia cip sak ding leh bei sak mang ding ahi hi.

An Assurance of Victory (Gualzawhna)

Kha galdona ah dawu mangpa a kizo khin sa a hihna thu anuai a bangin ih tel thei hi. Dawu mangpa ih do teh, ih cii leh sa tha neihna leh hatnate tawh a kizo hi lo hi. A hi zongin Zeisu in a zawh khit sa ahi hi. Topa Zeisu in dawu mangpa pen "Leitung ukpa" na ci hi. (John 12:31). Tua teh, Topa Zeisu in John 14:30 sung ah " Leitung uk pa hong pai a; ahih hangin kei tungah thu a nei kei ding hi,"na ci hi. Dawu mangpa in Zeisu tungah bang mah thu neihna, vangliatna leh hatna nei lo hi. Mang muhna sungah Zeisu in dawu mangpa tungah a gualzawhna lianpi ih mu hi. Mang muhna 20: 10 ah "A maute a kheem dawu mangpa in zong sahang leh thu zuau hilh kamsangte omna kaat mei phual sungah khiat sukna thuakin, amaute in sun tawh zan tawh a tawntungin bawlsiatna a thuak

ding uh hi".

Dotna khat ah, Dawu mangpa a kizo khin a hih leh bang hangin dodo lai ding ih hi hiam? Dawu mangpa tungah gualzo(kizo khin) ih cih pen in thuman a hi hi. Ahi zongin dawu mangpa in thu-um mite tung ah a sep theih hun bei nai lo hi. Dawu mangpa hun pen akiciangtan khin sa hi. Pasian in a ciangtan sa ni hong tun' ma siah, dawu mangpa in thu-um mite tungah nawngkai sak theihna leh ze-et theihna hun nei hi. Dawu mangpa pen nungta takpi a, na a sep theihna in, dawu mangpa hun ih piakna leh amah ih teel zawk man ahi hi. Bang hang hiam cih leh Pasian in ei tungah suak tatak a teel theihna thu hong pia khin hi. Dawu mangpa pen hoih lohna khempeuh ii makaipi pa bek hi lo in, hong ze-et zawh na'ng leh lungsim hong nep cip zawh na'ng in thahatna nei hi. Lai siangtho sungah dawu mangpa in Topa Zeisu a ze-et sim in na zo lo hi. Tua mah bang in ei zong Zeisu sungah i lungsim, ih upna leh i lametnate koih in, dawu mangpa nial leng i kiang pan pai khia ding hi. Ih nuntakna ah dawu mangpa in hong zo zo lo ding hi. Khat veivei dawu mangpa tawh gal kidona ah lel thei kha zel mah ding hi hang, ahizong in gal ih lel den kei ding hi. Bang hang hiam cih leh, gal dona in Pasian' aa ahi hi.

Hih kha gal dona thu ih et kik teh, kha sungah i gual zawh khitna thu hoih tak in len kip in, i lungsim tawng ah ih koih ding ahi hi. Dawu mangpa leh a ma' nasepnate ih et leh, i lung neu ding a, zong i lau ding hi. A hizong in, ih ngaihsutna leh ih upnate Zeisu' zawhna sungah koih leng, kha sungah tha hat den bek tham lo in, i no suah tawntung ding hi.

I Jh.2:15 sungah "Leitung ahi zongin, leitung ah a om nate a hi zongin, na it kei un. Leitung a it mi sungah Pa itna a om kei hi." ci hi.

A beisa kum khat lai pawl in, ka tate tawh Miami Metro Zoo ah cimphawng ka pai uh leh, ganhing tuamtuam ka mu uh hi. Mun khat ah mi honpi kikai khawm in, Zoo-a na seem 4 khawng in pawl no khat (show) lak uh hi. Lamet loh pi in, gul gol mahmah khat kilak a, mi 8 bangin tua gulpi pen pua sak uh hi. Tua pen, Burmese python, Kawl gam thaam, ci uh hi. US ah Kawl gam cih pen kua mah in a theih khol loh khat hi a, ahi zongin, Kawl gam a thei ngei lote' kiang ah, "Burmese python cih na za ngei hia?" cih tawh thu kipan thei hi.

Hih thaamte pen gul nam khempeuh lak ah a sau pen gul nam hi a, Kawl gam pan a thaamte pen leitung ah a sau pen in min a nei khat hi a, kum 25 bang nungta uh hi. Amau sang in, a gol zaw leh a tom zaw gul nam khat om a, tua pen 'anaconda' kici in tui gei ah om pha diak hi. Thaamte pen tui sung leh singkung kah siam mahmah lel a, zaan khuamial ciang zong khua mu mahmah lel hi.

Nidangin, ih pu/ pa-te in, thaam pen dawi aai nei dan in na gen uh hi. Amah pen, daai tak in, a kam ka sa in om a, a leii a phiat sak pen a galmuhte in lamdang sa in va neh seemseem a, a kam sung va luut uh hi, cih bang in kigen hi. Kawlte'n zong tua bangmah in na gen uh hi. Tu hun ciang, tua bang a tuak, a gen kik om lo ahih manin, up ding leh up loh ding pen khat leh khat ii ngaihsut dan ahi hi. Ih pu/pate bek tham lo mi namdang tampi in, gul pen dawi bang in na lau mahmah uh hi. Hindu, Cambodian, Native Americans pawlkhat, Australian Aborigine minam leh taanglai Greekte in gul pen pasian mun ah koih in a bia phial uh na hi hi. Dragon ki ci, guldawi pen a diakdiak in, Sente bangin bia uh hi. A taktak in, tua dragon a cihte uh pen, a gol dan leh a vun puak zia lim sung ah a suaihte pen, anaconda gulpi nam khat tawh kibang mahmah hi.

Kawl gam pan a thaampi khat 2005 kum in Gurnee, Illinois USA ganhing khawina ah kikhawi a, 403 lb(183 kg) gik in, pi 27(27 ft, 8.2 meters pha a, tu ciangciang a gol pen in kiciamteh hi. Hih thaamte bang hangin USA ah ong tung thei hiam? Mihaute in ganhing no tuamtuam khawi nuam se uh hi. Thaam pen a neu lai in, it huai leh khawi nuam kisa hi. Guu a neih loh ban ah, a siangtho pen ganhing nam khat hi. Sun ciang in, khua lumna 85-88 F, zan ciang 78-80 F ah hoih takin nungta thei a, an neek hat in, thau baih, gol baih uh hi. Gol semsem leh, kep hak semsem hi. A pumpi uh tawh ong vial thei a, a meei pan lehphel kik ding ahi hi. A sauna pi 8 a cin leh mi khat guak aa ding lau huai mahmah ta hi. Pi 8 a phak leh mi nih, pi 12 a phak leh mi thum, cih bangin pi 4 sim in mi khat ta kisam sak uh hi. Hi bang thaampite ong gol semsem a, a tawpna ciang an zong vaak zo nawn lo ban ah ong lau huai ta mawk ahih manin a khawi te'n zong gam lak ah khah khia ta uh hi. Gam lak ah,

amau na nungta zo lua, ganhing na man zo lua ahih man un, pung in Florida nuai lam, tuipei leh gun a kituah na munte (Everglades) ah naakpi kizeel ta uh hi. A diakdiakin, Hurricane Andrew a pian lai, tu ma kum 18 a kipan gam lak ah tampi kikhah khia hi. Everglades gam lak ah, kumpi a seem, awle-te tawh kumpi zaa ong kituh ta uh hi. A kimuhna peuh ah, a gol zawzaw, a mun hoih ngah masa zawzaw in zo a, khat zawzaw pen an suak ziau hi. Tu lai tak thupiang min thang khat ah, awle a nawmvalh thaampi pen a pumpi kitam in si cih MSNBC news ah kimu hi. Amah sang a a gol zaw awle nangawn that zo cih a kimuh ciangin kipatau mahmah ta hi. Kawl gam thaampi pen a ma' gam ahi lo, US ah gam ong keek hi (invasion), ci in mipilte in deih lo a, Kawl gam thaamte ong kipuak beh nawn loh na ding thukham pawlkhat Senator Bill Nelson in hanciam a, ahi zongin mihaute mah in lang pan uh hi. US a tung lam ah a kizelh toh ding kilau mahmah a, South Carolina ah mipilte (scientists) in khua vot zawk deuhna lam ah a nungta zo diam ci in keem uh hi. Tua tungtawn in, khua votna lam ah kah zo lo dingin lamen uh hi. Florida Everglades ah thaamte mat khuan governor Charlie Crist in pia a, tu ciangciang a kiman pen tul bang phata hi. Tua Kawl gam thaam a beng thei ding permit neite'n pen a mat uh ciangin, thau tawh kap thei lo ding, thang zong siah thei lo ding cih thukham zong koih uh hi. GPS system tawh koi lai mun ah kiman cih pen man (photo) tawh lak ding ban ah, a that khit ciangun a gil sung ah bang om cih zong thei sak ding ci hi.

Bang hangin Pasian in gul bawl sese hiam, a ci zong ki-om thei hi. Gul in lo khote a lo uh ah ante a susia thei zu sa nam tuamtuamte neek sak ahih manin lo khote' aa ding lawm hoih khat ahi hi.

Hih gulpite'n ganhing a matna video tuamtuam youtube pan ih en ciangin, a masa in a ha tawh pet masa a, a pumpi tawh vialh beh in, nakpi tak gaak a, tua a mat ganhing pen a lungtang khawl in sisak uh hi. Tua khit ciang, nawm valh kipan hi. Hih gul a bengte'n zong, a mai lam pan man ngei lo in, a meei lam pan man masa den uh hi. Tua ciang, a mit un zong khua a muh loh ding thupi a, puan tawh khuh pahpah uh hi. Ganhing awle hi ta leh, gul hi ta leh ong mat khak leh a mit suk siat sak thei le hang ong khah uh hi, a ci zong om hi. Amit leh a lutang, a khauh theithei tawh sat masak ding dan ahi hi.

Nidang in, i gam ah mangte'n gam ong keek ngei uh a, tu'n ahih leh US ah Kawl gam pan ganhing khat in gam keek leuleu hi. A tuntunna ah ukzawhna (dominance) nei uh hi. Kawl gam pan ganhing khat in hi zah ciang a kiim a paam dep zo ahih leh, Kawl gam ahi, Zo gam pan a piang Zomite zong ih tuntunna ah gual tung tuan zawhna a nei dingte ih hihna kimu thei hi.